



KENYATAAN MEDIA

**KEMENTERIAN PERDAGANGAN DALAM NEGERI DAN KOS SARA HIDUP
WILAYAH PERSEKUTUAN KUALA LUMPUR**

**Tingkat 16, 24-27, Sunway Putra Place
100 Jalan Putra
50622 KUALA LUMPUR**

No. Telefon : 03-4045 4555

No. Fax : 03-4045 4511

DUA BELAS (12) STOR DI JALAN PETALING, KUALA LUMPUR DISERBU DALAM OPERASI MEMBANTERAS PENJUALAN BARANG TIRUAN OLEH KEMENTERIAN PERDAGANGAN DALAM NEGERI DAN KOS SARA HIDUP, WILAYAH PERSEKUTUAN KUALA LUMPUR

KUALA LUMPUR, 21 FEBRUARI 2024 – Sepasukan pegawai Kementerian Perdagangan Dalam Negeri dan Kos Sara Hidup (KPDN) WP Kuala Lumpur, WP Putrajaya dan Selangor bersama-sama dengan Jabatan Imigresen Malaysia (JIM), Dewan Bandaraya Kuala Lumpur (DBKL) dan wakil pemilik cap dagangan telah menjalankan operasi yang dinamakan OPS PUTRA 4.0 di Jalan Petaling, Kuala Lumpur hasil daripada risikan selama dua (2) minggu. Operasi ini juga adalah kali keempat dilaksanakan bermula Mac 2023 kerana terdapat laporan yang dikeluarkan oleh *United States Trade Representative* (USTR) mengenai penjualan barangan tiruan yang berleluasa di Jalan Petaling, Kuala Lumpur.

Hasil operasi ini, serbuan telah dijalankan terhadap dua belas (12) buah stor yang dijadikan tempat penyimpanan barang-barang yang disyaki tiruan terdiri daripada jam tangan, kasut, beg tangan dan dompet berjenama. Kesemua barang-barang tersebut telah disita kerana disyaki dipakaikan cap dagangan secara salah. Serbuan ini juga turut menahan dua (2) perempuan warganegara yang mengaku sebagai pemilik stor berkenaan.

Hasil pemeriksaan di dua belas (12) buah stor tersebut, pasukan serbuan telah menyita 6,250 unit barang-barang yang disyaki tiruan terdiri daripada beg, dompet dan beg tangan dan jam tangan berjenama. Jumlah sitaan bagi kesemua premis ini dianggarkan bernilai RM300,000.00 (Tiga Ratus Ribu Ringgit) kerana disyaki dipakaikan cap dagangan secara salah di bawah Akta Cap Dagangan 2019.

Hasil maklumat yang diperolehi, kesemua barangan ini diperolehi dari negara luar dan kesemua stok ini adalah bagi tujuan penjualan kepada warga asing yang datang ke Jalan Petaling sebagai Pelancong dan juga kepada warga tempatan bagi persediaan menyambut Hari Raya Aidilfitri pada tahun ini. Kesemua barangan yang disita ini akan dijual pada harga RM80 sehingga RM1,000 bagi seunit. Maklumat yang diperolehi juga mendapati sepasang kasut tiruan berjenama dijual dengan harga RM100 sehingga RM600 dan harga kos adalah RM50 sehingga RM300 bergantung kepada kualiti barangan.

Bagi kes-kes yang telah dihasilkan ini, pihak kami akan turut menyiasat kesemua pihak yang terlibat di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2001).

Merujuk kepada statistik penghasilan kes harta intelek bagi KPDN WP Kuala Lumpur bagi tahun 2023 sehingga kini, sebanyak 135 kes telah terhasil di bawah Akta Cap Dagangan 2019, Akta Perihal Dagangan 2011 dan Akta Hak Cipta 1987 dengan nilai rampasan berjumlah RM4 Juta melibatkan sitaan barangan sebanyak 100,000 unit. Manakala jumlah tangkapan di bawah Ops Jeriji bagi tahun 2023 sehingga kini adalah seramai tiga puluh (30) orang melibatkan kesalahan berkaitan dengan harta intelek.

KPDN WP Kuala Lumpur akan terus mempergiatkan aktiviti penguatkuasaan undang-undang Harta Intelek di bawah Akta Cap Dagangan 2019, Akta Perihal Dagangan 2011 dan Akta Hak Cipta 1987 secara berterusan dalam membanteras penjualan barangan tiruan.

Pihak kementerian mengalu-alukan kerjasama berterusan daripada wakil Pemilik Cap Dagangan yang berdaftar bagi meningkatkan lagi kerjasama berterusan untuk membanteras aktiviti pengedaran serta penjualan barangan tiruan di pasaran. Usaha membanteras penyalahgunaan cap dagangan ini juga melibatkan komitmen negara kita di peringkat antarabangsa serta menyokong usahasama kita setelah menyertai *Protokol Madrid* yang berkuatkuasa pada 27 Disember 2019.

KPDN WP Kuala Lumpur memberi amaran keras kepada mana-mana individu mahu pun syarikat supaya tidak melanggar undang-undang sedia ada. Peniaga yang ingkar bakal menerima hukuman yang berat sepertimana yang ditetapkan oleh undang-undang.

Penalti bagi kesalahan di bawah Akta Cap Dagangan 2019 adalah seperti berikut. Jika disabit dengan kesalahan :

(A) jika orang itu ialah suatu pertubuhan perbadanan, didenda tidak melebihi lima belas ribu ringgit bagi setiap barang yang diletakkan perihal dagangan palsu, dan **BAGI KESALAHAN YANG KEDUA** atau yang berikutnya, didenda tidak melebihi tiga puluh ribu ringgit bagi setiap barang yang diletakkan perihal dagangan palsu; atau

(B) jika orang itu bukan suatu pertubuhan perbadanan, didenda tidak melebihi sepuluh ribu ringgit bagi setiap barang yang diletakkan perihal dagangan palsu atau dipenjarakan selama tempoh tidak melebihi tiga tahun atau kedua-duanya, dan **BAGI KESALAHAN YANG KEDUA** atau yang berikutnya, didenda tidak melebihi dua puluh ribu ringgit bagi setiap barang yang diletakkan perihal dagangan palsu atau dipenjarakan selama tempoh tidak melebihi lima tahun atau kedua-duanya.

Dalam operasi yang sama, pihak Jabatan Imigresen Malaysia, WP Kuala Lumpur telah menahan 10 warga asing iaitu terdiri daripada lapan (8) lelaki dan dua (2) wanita kerana gagal mengemukakan maklumat pengenalan diri semasa pemeriksaan dijalankan. Pihak Dewan Bandaraya Kuala Lumpur (DBKL) turut mengeluarkan enam (6) Notis Kompaun kerana melanggar akta berkaitan Pihak Berkuasa Tempatan (PBT).

Hasil kerjasama dengan agensi penguat kuasa operasi ini berjalan dengan lebih lancar serta isu keselamatan telah diuruskan dengan baik. Jutaan terima kasih diucapkan kepada agensi sahabat yang terlibat dalam menjayakan operasi ini dan kerjasama sebegini akan diteruskan dari semasa ke semasa.

Sebarang aduan boleh dikemukakan kepada pihak Kementerian melalui:-

- i. Portal e-aduan.kpdn (<https://eaduan.kpdn.gov.my>)
- ii. Call Centre : 1 800 886 800
- iii. E-mail : e-aduan@kpdn.gov.my
- iv. Ez ADU KPDN (aplikasi telefon pintar)
- v. Pusat Arahan Penguatkuasaan (Enforcement Command Centre
03-8882 6088 / 6245)
- vi. Whatsapp 019-279 4317

ARIFFIN BIN SAMSUDIN

Pengarah

Kementerian Perdagangan Dalam Negeri

Dan Kos Sara Hidup Kuala Lumpur.

22 FEBRUARI 2024